
Title	Tentang kekata: Tadika/tabika
Author(s)	Muhammad Ariff bin Ahmad

Copyright © 1992 Muhammad Ariff bin Ahmad

Haji Muhammad Ariff Ahmad

Sari Bahasa

SBC Warna 94.2 92021

Mei 21 1992

tentang kekata: tadika/tabika

Umur kanak-kanak masuk sekolah rendah ialah enam tahun. Sebelum kanak-kanak itu masuk sekolah rendah, ketika mereka berumur empat dan lima tahun mereka masuk ke kelas pra-sekolah, dalam bahasa Melayu Singapura disebut **tadika**. Kekata **tadika** ialah akronim bagi frasa *Taman Didikan Kanak-kanak*.

Di Indonesia, sekolah-sekolah **tadika** begitu, dahulu disebut *Taman Siswa* tetapi sekarang disebut **Taman Kanak-kanak** sahaja. Di Malaysia, sekolah-sekolah **tadika** demikian disebut **tabika**, iaitu akronim bagi frasa *Taman Bimbingan Kanak-kanak*.

Tujuan persekolahannya sama, umur kanak-kanak masuk sekolahnya sama, tetapi nama persekolahannya lain-lain: di Singapura disebut **tadika**, di Malaysia disebut **tabika**, manakala yang di Indonesia disebut **taman kanak-kanak** tanpa akronim, sekadar menggunakan singkatan **TK** sahaja; padahal dalam perkembangan umum bahasa Melayu, Indonesialah yang paling banyak mencipta dan menggunakan akronim.

Di Singapura, kanak-kanak yang belum masuk sekolah formal dididik di **tadika**. Konsep pendidikan itulah yang mendorong penaja sekolah itu menamakan persekolahan itu *Taman Didikan Kanak-kanak* dengan akronim **tadika**. Di Malaysia, mungkin orang menganggap fungsi persekolahan itu setakat 'membimbing; belum sampai ke tahap mendidik. Maka itu kata **bimbingan** itu diterapkan dalam nama persekolahannya *Taman Bimbingan Kanak-kanak*, dengan akronim **tabika**.

Tentang anggapan bahawa persekolahan itu merupakan *taman* bagi kanak-kanak, tidak ada perselisihan pendapat antara Singapura, Malaysia dan Indonesia. Yang tampak seperti ada perbezaan pendapat ialah tentang konsep persekolahan itu. Mungkin, jika Singapura menggugurkan kata *didikan* dan Malaysia menggugurkan kata *bimbingan* dari nama-nama persekolahan masing-masing, maka nama persekolahan *Taman Kanak-kanak* itu akan jadi 'sekata', sama ada yang di Indonesia, yang di Malaysia mahupun yang di Singapura.

sekian dahulu.